



Vitus Dermont ha tegnì ses ultim pled sco parsura dal cussegl grond.

FOTO Y. BÜRKLİ

## «Process politics dovran lur temp»

Pled d'avertura da la sessiun d'avust

■ (anr/fa) En ses ultim pled sco president dal cussegl grond ha tematisà Vitus Dermont l'adiever savens da las noziuns «persistent», resp. «durabel». El ha numnà er intginas da las sfidas per il chantun Grischun.

Il politichers discurrian gugent «e fitg savens» da la persistenza u da la durabilitad, ha ditg Vitus Dermont a chaschun da ses ultim pled d'avertura sco president dal parlament grischun. «Nus emblidain dentant che mo pauc en noss mund rasant surviva ina u duas generaziuns», ha el ditg e constatà ch'ins tshertgia ozendi soluziuns sveltas e realisaziuns immediatas. «Sche quellas soluziuns servan a la chausa è quai bun uschia, sch'ellas vegnan proponidas mo pervi da l'ideologia d'ina partida u causa prescripziuns administrativas chaschunadas dal sistem èsi da tractar soluziuns sveltas cun precauziun.» Dermont ha menziunà il proverbi «Nua che blers èn pertutgads, duain era blers

prender part da la discussiun e da la decisiun»: Perquai dovran process politics, sco ch'el ha punctuà, era lur temp: «Cuntrari a l'economia privata avain nus, en l'economia publica, da prender resguard a tuts.» Il chantun Grischun saja bain londervi, ha manegià Dermont, «sin nus spetgan però anc bleras lezias. Tge pudain nus far per dar impuls economics era per la part sura da la Surselva, l'Engiadina Bassa e las vals da lingua taliana – e betg mo per la Val dal Rain grischuna e l'Engiadin'Ota?», ha el menziunà sco exempel, «mo uschia pudain nus evitar la depopolaziun en bleras vals grischunas.» In'otra lezia dal cussegl grond grischun è tenor el da crear «anc dapli chapientscha e dapli voluntad da cooperaziun tranter las trais linguas en il chantun.» Dermont ha giavischà a ses successur, a Michael Pfäffli, gist tanta satisfacziun sco ch'el haja gè durant l'onn a la testa dal parlament grischun.